

TITINE

(A l' après dèss "Trifouyaedjes dèl morâlè" do Dîvin Mârkeu d' Sâde)

(4)


Yèyète a pris pacyince deûs ans po s' décider èt sayî d' èvoyî s' n' ome au Paradis dèss cômârds sins k'ène sakî n' pinse k' èle î èstève po l' pus ptite sakwè. C' èst pokwè i lî a falu co ène boune anêye d'pus po ièsse tot à fait lîbe di fé tot à s' môde. Adon, dins l' vichnauve, on avève dèdja bèn roviyî k' èle avève stî on timps ène feume di mwêje vîye. Tos lès djins dèl boune soce, lès Mossieus ossi bèn k' lès Madames, vinîne dins sès chîjes si cotaper à danser, rloper sès féns vins èt s'è mète plin l' vinte d' bon amougnî dins lès bons sopers k' èle organisève.

Lès pus ritches dèss omes di s' roler à sès pîds èt d' payî dèss cints èt dèss miles pou passer l' nût avou lèye èt n' riwêtfi nérén à l' dispinse si, à l' astchèyance, èle volève bèn s' lèyî èmwinrner dins lès îles po sakants samwinnes di condjîs au solia. A co nén vintchîj ans, èle avève rwiné ène novèle boune dimêye dozinne di gros cinsis, deus èvèkes èt trwès nôbes d' fwârt wôte lignîye. Po s' fé mète dsus on tèstamént èle ni riwêtéve nérén à on èmantchâdje di pus.

Bén sûr, maugré k' èle purdève tot cki falève come précôcion, èle s' a vèyu prîje trwès o kat côps èt, sins balziner, fé passer cki n' alève nén manker d' lî spèchi s' plat vinte.

Tot ça n' l'èspêchéve nén d' bèn dwârmu li rèsse di sès nûts djusk' a plandjêre èt d' profiter do bouneûr d' awè d'pus ki n' lî falève come caurs à dispinser. Minme k' èle n' si s' avève si djoker d' taper sès filèts èt d' ramwinrner l' cia ki s' fwartune lî avève tapé dins l' ouy èt lî rade risètchi sès boûses.

On a bau dîre, mins parêye vikêrîye fini pa ièsse dèss pus naujichantes po li skine. Lès mèyeus dèss atlètes s' ritrovenut coût



d' alinne. C' n' èst nén pace k' on conèt lès cayèts do coron dèss dwèts k' l' ardance ni discrèche nén. On s' sint d' pus è pus odé èt on dvént tot doucemint nawe a n' doner ki l' mèyeu.

Yèyète on matén a compris k' lès timps èstîne vinus di s' rapauji. Èle n'a nén di non.na kand Mossieu d' Cwarville, dins lès cinkantes ans bèn bomés èt nanti à n' sawè conter, l'a priyî di s' mète è mwinnadje avou li.

On anûti, i s' èstîne dèdja tot sâdjemint èt paujêrmint acoplès dispû cauzu cènk ans, i rintrîne d' awè stî prinde lès aiwes one kénzinne di djoûs à Spa, kan on a vinu toker à leu n' uch...

On comache todi...